

SANDRA ŪDRE

Rēzeknes Augstskola
sandraiudrei@inbox.lv

Ar grīzšonūs saistēituo frazeologeja i leksika

Daļa ar grīzšonūs (iz vītys / iz prīšku / vierpetē) saistēitūs leksemu, kai *skrytuļs*, *komuļs*, *mutuļs*, *žvūrgzdyns*, *maule*, funkcionēj kai frazeologismu komponenti. O. Rupaiņa dorbūs ekspresīvais *mutuļs* atrūnams i frazeologismūs (*nūīt iz mutuļi*, *nūskrīt iz mutuļi*, *īt mutuļmutuļim*), i kai personvuords *Mutuļs*. Izsaucīņš *ot*, *maule!* litoj sadzeiviskuos naveiksmēs i izskaidroj ar mauli kai bīžuok problemys rodūšū detaļa zemņika braucamūs inventarā.

Tok L. Latkovska pīraksteituo ļauna vieliejumu formula *Komuļi*, *komuļi!* *Skrytuļi*, *maulē!* i kusteibys konceptam veļteitī dziļuoki pietejumi slavistikā (kruojums “Kusteibys koncepts volūdā i kulturā”, 1996) līk vaicuot myusu dīnuos damierstū semantiku mitoloģiskā leidzīnī — kosmiska parāda i rotejūša haosa pretstatejumā. Ite apsaverama ar spiesšonu saistēituo leksika.

Pasateicūt deju ansambļa nūsaukumam, ari izlūksnēs moz zynomais i tekstūs nadajiuktais dzyga nūsastypynovs ar atlasynuotū nūzeimi ‘daņcs’. Tok slavu vuordineicuos fiksātī ekvivalenti *дзыга*, *зыга* ‘žvūrgzdyns’ i jūs atlasynuojumi līk dūmuot par dziļuoku etimoloģisku saikni. Ci saleidzynuojuma *puiss kai dzyga* asociatīvais sakars saistoms viņ ar doncuošonu?